

四庫全書

集部

欽定四庫全書

集部

文恭集卷二十三
四

詳校官侍講臣王燕緒

檢討臣何思鈞覆勘

總校官原任中允臣王燕緒

校對官編修臣于鵬

謄錄監生臣章玉植

欽定四庫全書

文恭集卷二十三

宋 胡宿 撰

內制

除韓琦特授依前工部尚書同中書門下平章事

集賢殿大學士加食邑實封改賜功臣制

門下春秋大事載合食之文建武舊儀有親祠之典朕
永追來孝邈企前徽因時物成考古祫祭具法物之駕

款神祖之廷儀采焜煌牲玉純潔殊方底貢羣岳入陪
誠志孚通聖靈開饗適成熙事誕賦祥釐翼我盛容時
惟茂宰爰疇爾賞式告于廟具官韓琦秉志忠純蹈道
夷正居然時傑之望司我大政之均有惟深之明以通
于衆志有咸德之美以弼于朕躬而自孝享矢謨先庚
孚號總乃容臺之議協于齋殿之恭率籲臣工拱侍裸
獻明發不寐朕深儼然之思馭假無言爾有顯若之色
自鬱酒之云灌訖丹燎之既升率履弗違右饗如答至

陽顯見積晦開消還御端門飲至大寢益以褒功之號
拓茲衍食之封實賦有加異數斯在於戲相予肆祀既
格于休嘉勉爾亮工益思于輔拂時惟良顯往其懋哉
除韓琦依前工部尚書同中書門下平章事集賢
殿大學士加食邑實封仍賜功臣制

門下亮成天功實繫于宰職緝熙王道允寄于賢才矧
久服于機庭且周知于治體俾正中階之象用膺次相
之文既考師言復涓剛日式揚孚號誕告庶工具官韓

琦志度純深才器高妙行足厚于風俗言必合于典常
立于本朝毅然懷體國之色訪以大畧直哉有匪躬之
風曩者獷俗擾邊勁兵宿野始仗指蹤之畧遙升基命
之階間從書殿之華就寵師干之拜持中山之師節臨
大鹵之盛秋寂無邊虞深得戎重召言還國申命極樞
總是煩機議茲舊物謀而鮮過慮不及私備挹猷為罄
宣忠力文武參試固亮節之卓然台宰對司在至公之
允若是用參之龜策付以機衡仍登書殿之名更拓土

田之賦於戲寅亮天地之化調序陰陽之和衡石無心
以平而為體橐籥有道以虛而為宗勉思此言同底于
治

除韓琦特授特進依前檢校太保充武康軍節度
使加食邑制

門下朕以天統上正日晷長至明發裸于世室昧爽祠
于郊丘靡神不宗虔乃有孚之享登禮必答擁我無疆
之休訖侍中之解嚴趨太常而賜昨時則儒帥朕之名

臣董齊耳目之師倚殿股肱之地議勞惟素頒賞宜先用敷慶策之文聿進崇禋之典具官韓琦業宇高劭風德修明卓爾傑材之宏居然皇器之重體侔金石介然不易其常量均江河撓之莫見其際更試文武踐揚藩朝秉是精忠濟之明識早著勲于西畧旋翼務于內樞參斷幾微交修久大匪躬之故慮不及私造膝之謀舉無遺策迭更出處交厚眷毗常山臨代之衝大鹵近胡之地悉號勁兵之處委臨制閫之雄建以高牙成茲安

枕會卜郊于三歲庸薦禮于百神列上計書述修貢職
率先乎羣岳旅次乎大庭逮朱燎之訖儀及玉車之還
軫孚休宇縣覃施臣工乃睠元侯特崇貴級用加地進
律之法申拓井開賦之恩飲至勞旋厥惟舊典疇庸進
等茲示茂恩於戲郊廟虔恭乃承敷佑君臣敕戒惟是
幾安獲此康年成于大報恩與俊舊永底顯休

除文彥博特授檢校太尉同中書門下平章事使
持節孟州諸軍事行孟州刺史充河陽三城節度

使判河南府兼西京留守司畿內勸農使加食邑
實封制

門下四輔居中用緝熙于邦采二伯治外亦藩屏于王
家雖易地而畧殊在殿邦而迭重眷言茂宰求解冢司
有嘉靜退之風特舉褒優之典兼徵台鉞誕告臣工具
官文彥博格量冲深體用安重資疏通之明識蘊強濟
之敏猷卓爾偉材本克生于王國居然奇璞早見器于
宰朝拔自時髦經我世務歷樹風于方面亟聞政于宰

司屬以盜發甘陵氛生朔壘義能首奮師以凱還名繫
民瞻功惟朕念爰立作相遂正三階之文用乂于朝乃
總萬樞之務逮分垣翰遄授旌旄開幕府于長安委節
制于全雍眷求予弼圖任茂勲式序上司復光舊物居
百度將明之重比歷暄涼在三事弼諧之先尤彰夙夜
方篤仰成之眷遽陳謝去之章諭言且勤誠意頗固興
化致治雖資秉哲之良均逸偃藩亦廣養恩之義姑從
所欲仍示寵章榮以鳳池輔之虎節析孟津之茅瑞委

洛宅之符書加衍土田中崇功號悉舉疇庸之數誕昭
懋賞之文於戲出處之方並揚于休命進止之度有美
于庶言往惟欽哉無忘夾輔

除文彥博依前檢校太尉充忠武軍節度使授特
進加食邑制

門下朕具法物之駕自宮徂郊崇精意之禋奉特與璧
緒正鍾律祓飾典文袞對于上神參侑于列聖燎熏焜
耀雲景杳冥降福協于孔皆祝釐難于專嚮矧惟時傑

早陟冢司倚居夾弼之崇領帥輔邦之重宜優羣后均
沐靈休具官文彥博志度淵冲體範明劭抱公台之偉
器肖辰象之至精際會盛期迪宣遠業沈機先于大蔡
勁節表于疾風著投袂勤王之勞清于朔壘應吹沙作
相之兆變我辰階迹美規隨志存幹翼避丞疑之上席
委節制之中權張我天聲帥于雍部圖金城之方畧參
寄老謀撫井鉞之師兵坐資雄槩益重出藩之望用紆
西顧之憂屬以清廟告虔紫宮拜貺述修祀貢之職率

循侯度之儀風尚忠圖益欽志嚮逮展成于元祀惟肇
敏于舊勲賞不可淹禮宜加腆爰頒獎策用進崇階即
優衍之前封廣陪敷之異數於戲乾祇開佑乃歆至治
之馨藩岳屏毗以底中邦之靖益圖夾輔永服休嘉

除宋庠河陽三城節度使檢校太尉同中書門下
平章事判鄭州制

門下古者謀帥必本于詩書雅云憲邦實繫于文武眷
言俊老久典煩機比陳控避之章宜舉閑勞之典有嘉

舊德早正中階宜升節制之榮仍寵台司之重誕揚孚
號頒告外朝具官宋庠為時耆英秉德純粹通于道術
之韞濟以文采之華擲自機廷之嚴入正嚴廊之拜輔
相厥辟協泰象財成之宜偃休于藩得大雅進止之度
頃從列屏召置首樞咨帷幄之籌賴樽俎之算直清行
已粹密存誠溫樹不言奏章隨削參萬幾之務均三品
之更夙夜惟寅耆艾斯久出于兢畏之性比形挹損之
言表解洪樞請行外閫是用輟從前箸寵以命圭崇利

建于盟津便均勞于鄭圃師干之試蓋寵于元猷台鉞
之崇用褒于哲輔優封拓井真食加田茲示便蕃以疇
密勿於戲左右陪輔地雖重于二樞內外屏毗義則均
于一體往服朕命以藩王家

除宋庠特授檢校太尉充樞密使仍賜功臣制

門下效法斗宮崇建樞省翼萬微而置使必取傑才聯
三事以兼司用優俊老抑惟舊物申告正朝具官宋庠
博洽藝文休有道德方重而不倚直清而無徒蒼壁方

琮追琢成于祕寶黃鍾大呂考擊見于正聲往在朕初
得之首舉典策光于施命臺閣練其舊章啟沃善言進
必依于義理束修雅行靜有補于風華嘗升號于機庭
迺正名于中鉉性資慎重問溫樹而不言志在將明恥
袞職之有闕謨謀日淺靜退可嘉偃休歲深素履彌劭
屬以內樞闕職前著待籌圖舊是先選衆攸舉登我碩
德議茲煩機論道本兵在二司而均重秉文經武亦一
德之參圖俾升台宰之名仍衍土田之賦崇茲掌武昭

厥殊章於戲戎事惟艱人謀匪易吉之先見蓋韞于幾
深擬而後言以成其變化昭我舊德豈忘訓辭往體朕
懷以全慎道

除賈昌朝特授依前檢校太師同中書門下平章
事山南東道節度使進封許國公加食邑實封制
門下朕迺者夙興聽斷日昃劬勞三慎凝懷暫屏于煩
慮九乾資氣遘納于太和蓋穹祇之擁全繫祖宗之保
固乃卜季秋之吉奉祠路寢之嚴始升薦于齋誠庸答

揚于景貺執事有恪馮假無言升燎告成休氣來擁思
與羣后均被蕃禧再崇進律之文宜先主籥之望具官
賈昌朝材居邦傑德映民宗經術號夫通深謀謨推于
閔博便朝講勸早授道于朕躬冢司弼諧嘗用乂于厥
辟休有風業著之巖廊鼎辭政軸之勞游委師干之總
三階之象參耀于乾台二南之風載融于道化眷言朔
土重莅別京當洪河渤碣之流臨天街畢昴之次屏毗
王室安輯戎疆厥庸居多乃望惟穆屬鉅儀之云究當

慶賜之遂行賞蕃宣之功詩美申伯賜文武之胙傳尊
齊侯是用爵以上公邦之舊許仍徹土田之數益崇井
賦之真舉是寵嘉並優哲艾於戲祭則受福敢專在于
眇冲賞以懋功諒無踰于俊老往服乃命永孚于休

除賈昌朝行尚書右僕射依前檢校太師兼侍中
充景靈宮使充鎮安軍節度使加食邑實封仍改
賜功臣制

門下崇器大名必歸俊乂之德繁機劇柄重累元耆之

賢特推進律之恩俾解持樞之任仍伸舊典用預殊章
涓乃剛辰告示列位具官賈昌朝道器明遠德範沖深
蔚為儒宗達于治道隤然公輔之量夙表大成卓爾巖
廊之材早彰厚質自膺枚卜遂正阿衡盛業著于規隨
嘉謨盈于啟沃曩辭魁柄之重再司留籥之嚴撫全魏
之都畿領北方之節度左右修輔抑惟舊學之臣內外
屏毗亶著老成之望仍屢辭于尊秩且益表于謙風臯
者渴見儀形召還樞宥彌罄同寅之節逾昭秉義之忠

惟機務之煩然且神明之勞止本兵經武雖深賴于老
成均逸代勞姑寵綏于碩德眷言舊物申舉前恩兼東
臺常伯之名正文昌右相之重陪我京室書社淮陽仍
總治于靈宮益衍封于采地用優俊老式示寵章於戲
羣務幾微有嘉于匪懈上卿進退實美于無猜惟我師
臣往體朕命

除賈昌朝依前檢校太師同中書門下平章事安
國公充山南東道節度使加食邑實封改賜功臣

制

門下肅若齋輅類于陽郊合祛天地之尊

案祛字原本誤作祛考漢

書倪寬傳合祛于天地祛從示不從衣今改正陟配祖宗之聖奠璧而精志達

升燎而瑞福通還霈寵靈均敷貺施欽嚴主籥之地我
有宗臣睠惟賜祚之功疇先伯舅宜頒獎策以洽舊儀
具官賈昌朝經為儒宗才乃朝匠雅有威德之美韞于
精識之微迪厥誠明蹈中和而範俗邃于術畧躬文武
以憲邦彛入冠于台司實委成于魁柄體有巖廊之重

志存王室之先密勿訐謨絜話言于三策遂巡退讓穆
風化于二南進兼台鉞之崇入儀書殿之重再光舊物
還殿北門撫茲畢昴之疆安于常岱之鎮底乃嘉靖賴
于耆明甫修郊報之儀首虔方貢之職壯猷可尚美志
逾昭屬熙典之迄成顧寵章之昭舉申加功號開衍食
租胙井牧之真封峻雲臺之美稱參寵持衡之舊庸昭
進律之殊於戲禮縟文繁氣調時豫惟帝享此奚德致
之思元首之歌幾微之必以戒念成命之頌恐懼而不

敢康獲成上儀嘉與舊德率由茲道茂對天休

除王德用特授依前檢校太師同中書門下平章
事兼羣牧制置使充樞密使河陽三城節度使加
食邑實封仍改賜功臣制

門下內樞之地土範于斗宮前箸之籌參寄于人傑以
經常武之事是號本兵之司圖冠厥名疇總予務乃眷
元侯之長早崇右府之聯爰擇剛辰復還舊物具官王
德用志懷果烈風槩沈雄通于奇正之謀居然間傑之

氣春秋閱禮韞義府以惟深甲令書忠載世家而有舊
比膺推轂洊歷干城先十乘以臨戎長萬夫而觀政德
刑具舉威惠參施能名播于外夷沈機隱于敵國鄉咨
俊望擢典繁機翼濟事功迪宣忠力乎乃識而匪懈研
諸慮以惟微旋均基宥之勞亟樹蕃宣之治蹈險夷而
一致服忠孝而兩全簡在朕心洽于朝聽是用升鳳池
之寵秩聯虎節之榮章倚殿輔邦用陪京室屬右樞之
缺職咨羣岳以擇材僉曰汝賢宜弼予治蓋天子二老

出以居方伯之尊，橐內諸侯入則處公卿之任，抑惟曩制舉是隆，名用起壯猷，使纘舊服，仍峻雲臺之號，兼增井牧之封。式厚耆英，有加名數於戲；樞機發令，制戎事以惟艱。樽俎折衝，經人謀而匪易；往慎乃位，益思其忠。除王德用特授依前開府儀同三司、檢校太師、同中書門下平章事、充樞密使、河陽三城節度使，進封魯國公，加食邑制。

門下朕屬者，宮厚降康，祖宗介福三壇，新命見錫于壽。

臧萬宇歡心同均于愛戴思答揚于貺施乃祇被于禁
嚴合祀大神參侑先烈四海駿奔而助祭羣后肅雍而
在庭薦鬯而精意通升燎而靈氣格敢專享于純嘏思
均澤于庶工爰舉寵章宜先近弼具官王德用沈雄植
操明允抱誠毅乎有師帥之風侃然通軍國之務出于
勲閥濟奕世之忠規冠厥樞庭擅本朝之宿望以謹質
而被倚愛以慎重而典幾微處進退而無愠容歷夷險
而有常德中間謝事尋還內密之司久試益忠能保後

彫之賞處節旄之極寵兼台鉉之至榮耆艾之節益堅
謙挹之心彌固侍我祠事煩茲老成用圖陟恪之勤參
錄寅恭之志加地進律予以荒于大東疇德表功茲用
陪于多賦益疏真食舉洽至恩滋寵壯猷式頒獎策於
戲君臣一體在休恤之均同天地合祛宜蕃禧之康共
往服茲命永孚于休

除龐籍特授檢校太傅昭德軍節度使永興軍一
路兵馬都部署安撫使兼知永興軍加食邑實封

制

門下稽若前王拜于大帥或跪而推轂伸其制閫之才
或齋以設壇崇茲授鉞之命矧惟迪德之佐抱乎全器
之能載涓日策之良爰委師干之試頒夫明制告于廣
朝仍資分陝之行實允憲邦之望具官龐籍精明異稟
英博多通自進服于邇僚旋敷聞于大政沈謀至策蔚
懷人傑之姿碩德壯猷亶為王室之老日者種羌負固
邊部繹騷將武庫之精兵護延安之絕塞資其智畧宣

我威靈逮河曲之懷柔屬邊亭之撤警沿其雅意置諸
本朝文武參施顯偉才之絕備台樞迭踐見盛業之交
修邇均逸于近藩邁進儀于祕殿教條所賦苛慝以消
休有勤勞孚于羣聽屬以長安闕帥西夏須才圖雄俊
之寶臣疇綏予衆正嚴莊之師律僉曰汝賢是用按上
黨之封因名闕之固析茲茅瑞徹彼土疆仍光傳道之
名兼實陪敷之數前驅六纛外冠十連泣茲鶉首之郊
頒我虎符之政以寬西顧爰屬老成於戲茲乃舊都厥

惟全雍爾其將節制之命審控帶之宜從外折衝矧羈縻之有素居中作扞惟安輯之在初善撫朕師往對休命

除龐籍依前尚書戶部侍郎知鄆州仍改賜推誠保德翊戴功臣散官勲封食邑實封制

門下圖治之世宜本至公預政之門合防嫌迹矧居四輔之首允在百僚之先苟罹干請之名殊失仰成之意兼沿章削俾解政機具官龐籍志度淵冲業宇明劭韞

才謨而敏達更事典以淹通早翼務于本朝游服勞于
近職雅有風采蔚著猷為乃者西州用兵延安近寇屬
輕裘之謀帥煩籌筆以制邊戎索以清夏人來附乃眷
西顧予嘉乃勲始召置于樞庭旋擢參于宰府閫外無
事頗見于匪躬天下既安允膺于注意遂正斗樞之號
迺升邦鉉之名固宜厲以正方繩于羣下而乃親聯交
構私謁彰聞逮有司之訊詞合杜門而待罪及行弊斷
乃失重輕致公議之弗容在人言之莫遏尚矜舊德兼

覽奏函聽避位于台司俾均勞于藩服委東平之安輯
便樂土之康嘉於戲罷免之科蓋拘于典制進退之禮
用正于臣鄰勉賦寬條弗忘累效

文恭集卷二十三

欽定四庫全書

文恭集卷二十四

宋 胡宿 撰

內制

議樂詔

案是詔在皇祐二年閏十一月

朕聞古者作樂本以薦上帝祀祖考三五之盛不相沿襲然必太平始克明備周武受命至成王時周公始大合樂以和邦國漢初亦沿舊樂至武帝時始定泰一后

土樂詩光武中興至明帝時始改大予之名損益前後以制樂節唐高祖造邦至太宗時孝孫文收始定鍾律明皇方成唐樂是知經啟善述禮樂重事須三四世聲文乃定國初亦循用王朴竇儼所定周樂太祖患其聲高遂令和峴減下一律真宗始出聖意大祠用樂又議隨月轉律之法屢加按覈然念樂經久墜學者罕傳歷古研覃亦未究緒頃雖再三考定博訪知音終未有的究古今知聲知經可信之人嘗為改更未適茲意如其

制作益須切當宜委中書門下集兩制及太常禮樂官
將天地五方神州日月宗廟社蜡祭享所用登歌宮懸
審更定奪聲律是非按古合今調諧中和務要議論允
適經久可用垂信不朽使祖功宗德發揚無窮神祇感
格善氣來應苟獲至當何憚改為但審聲驗書二學鮮
並互詆胸臆無所援據慨然希古靡忘于懷尚賴洽聞
共圖盛節故茲詔示想宜知悉

諸后祫享依舊詔

朕惟春秋大事在于禘祫前詔太常按舊禮期以孟冬之吉躬祀祖廟庶因合食聖靈相接以廣蒸蒸之孝而一二禮官因別廟四后有疑論焉訂之諸儒議久未一深惟祖宗之制至重至尊祖宗以來有司攝事行之久矣祥符中復經聖考著明詔當時禮官講求已云莫可廢也矧茲眇末甫崇孝享其敢廢先妣之舊典常禮重違先帝之聖志哉今親享在邇未可輕議其孝章孝惠淑德章懷皇后祫享且依舊典候過大禮令禮官重

加討論咨爾輔臣務于仍貫故茲詔示想宜知悉

孟冬親詣太廟行祫享之禮御札

朕顧循菲質膺守聖圖潔幣玉以事乾祇嚴圭鬯而奉
宗廟惇修將禮舉秩無文亦嘗復耕藉于靈壇恢宗祀
于路寢斯牲匪愛靡神不尊用能誠志達于幽明馨香
格于上下靈休見擁至治用康永言孝思有懷先烈惟
祫享之義著經禮之文大祭先王合食祖廟盛迪嘗之
薦深肅儉之懷追孝奉先莫斯為重茲享之廢歷年既

多有司所存出于假攝禮之將隆朕甚惜焉卜以孟冬
備茲法駕款于太室親薦嘉籩宜示先期以伸誕告朕
取今年十月內擇日親詣太廟行祫享之禮其今年冬
至親祀南郊宜即權罷所有合行諸般恩賞並特就祫
享禮單一依南郊例施行至日朕親御宣德門宣制仍
令所司詳定儀注以聞務遵典禮勿俾煩勞咨爾多方
咸體朕意故茲札示想宜知悉

皇祐五年南郊御札

敕內外臣僚等夫四時常祀戒在有司三歲親祠敢稽
舊典迪惟列聖光施沖人獲執牲瑄以事郊廟永惟欽
慄弗敢怠遑間亦耕藉而供粢盛宗祀以虔珪幣合祛
天地參侑祖宗庶幾告誠豈曰能饗惟時上帝賜朕有
年嘉生順蕃黔細滋殖豈瑣涼之致此抑右序之俾然
矧今區夏謐如風雨時若鐘石甫就壇場在望四海助
祭族蒼璧之舉百神受職係皇邸之設思欲裸鬯酒于
世室進純犧于泰時因以昭孝範俗延祉庇民敢憚必

躬而廢大報朕以今年十一月四日有事于南郊咨乃
攸司相予肆祀各揚爾職勿懈于位諸道州府不得以
進奉為名輒行科率務循靖壹勿使煩勞咨爾庶邦當
體朕意

禁內降詔

朕紹承駿烈祇服先猷蹈道以臨庶邦謹憲而持大柄
馭之予奪正以賞刑悉任至公靡容紊法比有愴幸肆
興妄圖或違理覬恩或負罪希貸率求內出間亦奉行

蠹政虧風莫斯為甚雖屢頒于詔約曾未絕于斯途兼
慮臣庶之家近貴之列交通請託巧詐營為陰致貨賕
密輸珍玩蚩緣結納侵撓權綱方務澄清當嚴禁詰儻
復違犯斷在必行重念成湯以六事責躬女謁苞苴之
先戒管氏以四維正國禮義廉恥之具張矧宗祀之涓
成屬祥釐之均被嘉與中外絀此非衰勉于自新以隆
至治今後應內降指揮特與恩澤及原減罪犯者並仰
中書樞密院并所承受官司具前後詔條執奏不得施

行及臣庶家如有潛行貨賄結託貴近者並令御史諫官覺察論奏咨爾丞弼體朕意焉故茲詔示想宜知悉
賜百僚乞御正殿復常膳不允批答

朕奉承聖業循守政綱旰夕固勤沖晦罔識譴告自上
壤食為災日月之行誠有常度春秋之戒則在正陽探
觀前王臨制大器或遇裁而懼或罪己以興莫不深蹈
兢危躬自菲薄僅能消復或底和平矧在寡涼敢忘降
挹是用避路朝之坐損大官之庖庶幾感通有所開右

卿等義均休戚情深愛戴願臨正寢祈復常珍雖嘉乃
誠難徇斯請勉思勿懈以輔不及書不云乎無疆惟休
亦無疆惟恤

賜宰臣富弼以下上第二表乞皇帝御正殿復常
膳不允批答

夫元者三朝之吉日者衆陽之宗厥有食焉茲用惕若
豈予弗類在治未昭天其警諸變或在是探觀前載敷
求哲王或罪己以興或遇災而懼庶幾菲薄以昭抑畏

是用損去常膳退即便朝期底和平以消災慝僅踰旬
浹未覺勤疲而卿等率籲臣工繼陳章表請御正寢求
復庶珍雖愛君之心良篤于義而應天之道要當在誠
第嘉乃陳難議其可

賜皇兄允讓等上表乞皇帝御正殿復常膳不允
批答

朕纂膺乾統劬勞日昃思入庶政以登至平寡昧弗昭
未識厥路上天降咎正陽有食豈非明不能燭治有大

虧天其警予慎思其闕是用避正朝之坐損內饗之膳
恭默計過恐懼真懷庶感通于昊蒼獲消救于氛慝卿
任居宗翰情均休恤勉修所職以輔不逮若乃御法宮
之黼座復大官之鼎味雖嘉誠愛難俞章削

賜皇親批答

夫月書王正表年之所謹日象君德秉陽而弗虧惟端
朔之辰有壤食之異豈智臨之或爽將道化之未孚發
見陽明開示乾戒用損去庖品避居路朝惕厲以寘懷

淵默而思咎庶消陰慝以底天和而卿等地在親賢義
同休恤繼形章請再達予聞願臨正屏之朝祈進常珍
之品誠存愛戴辭甚懇勤姑務省修以圖消復雖嘉美
意難俞來請

賜北海郡王允弼上表謝皇帝御正殿特賜俞允
批答

初炎紀朔大明致虧日官以言天象垂戒是以避路朝
之坐損膳宰之羞冀緣惕厲之誠庶通消救之道而羣

公庶尹宗邸親良迭敷乃誠稔達予聽請御當陽之坐
祈復兼珍之餐章削紛盈誠節款到已嘗開許煩有敘
陳

賜宰臣文彥博以下上表賀今月四日皇帝御崇
政殿疏決刑獄五日降雨批答

近以春土可耕時澤猶爽密雲屢族宿麥將瘁申禱未
驗用思孔疚顧哀都獄豈無寃人夙興便朝分條繫者
親加慮問率俾降原冲志獲通休應來表纔翊日而協

氣至未崇朝而甘施洽消百苛之欲作紓三農之勤望
感召潛契朕誠悅焉雖協哀矜之期亦繫敷燮之助卿
等心存理物善在稱君亟剡奏函願書信策深昭將順
之意尤多嘉尚之懷

賜宰臣陳執中以下為上表賀崇政殿疏放刑獄
即時降雨批答

朕以雩祀既虔時澤未效秋種所急夕惕用勤顧哀邦
氓牽陷都邑其中繫者豈無冤焉傷和致災或恐在是

因臨便殿親為慮因且示哀矜悉從原降書不云乎與其殺不辜寧失不經未旋晷而和氣通弗崇朝而嘉澍洽驕陽以屏豐歲可期卿等地在弼諧志敦將順遽閱奏函之上願從信策之藏載省寅恭良多愧尚

賜文武百僚陳執中以下上表賀為今月一日太陽當蝕虧分不及算數并陰晦微見詔

邪慝侵陽推步在朔肅若乾戒惕于朕心退即便朝損御菲食寡昧所值怵懼弗寧天維顯思月既晦止雲氣

簇于甲夜雷雨降其中天逮翊日之將晡纔微陽之見
象驗諸食壤減于算分此皆上穹輔持列聖開右既惠
朕以膏澤之施復警予以曜靈之虧俾無怠荒敢弗抑
畏夫應天以實感人在誠期與臣工之良永思政治之
要用消厥咎益孚于休卿均是憂勤志于將順煩有稱
慶良增愧尚

賜宰臣富弼以下上第三表乞加上尊號不允批
答

昔孔子達者辭不稱仁光武賢君禁諸言聖朕每覽前
典莫不嘉此且帝王之道安在于彌文而天人之心所
助者資順謙乃益之本損者德之修矧以眇身承茲大
業仍以菲德享諸鴻名猶懼弗任居常自惕幸羣元之
隤祉荷累世之延洪治無甚虧時則咸靖思欲致四海
之祭合七廟之靈考卜孟冬躬行大祫豈曰能事抑惟
舊文而卿等率籲羣司推高眇質將順其美鋪衍厥章
願鏤寶文益上徽稱極大仁之丕冒昭至化之巍成美

溢而浮志慚且悸再嘗批諭猶執控陳況乃愛戴所深
形容已至宅帝皇之大席神聖之高固已華出古先徽
兼上睿若俯徇于誠請更益施于號榮既乖本心恐累
台德

賜宰臣文彥博以下賀老人星出見批答

景霽秋旻氣分商仲南極呈于秘象清臺獻其壽占卿
等道著弼諧任居毗燮喜聞吉語煩有賀章請以天官
之言屬諸史氏之掌體誠同于元首義足表于愛君載

省寅恭良深嘉尚

賜宰臣富弼以下賀壽星出見批答

金氣中分珠躔上見清臺設候疇人獻占述昭爛之乾
文告壽昌之福兆卿等義存將美志在祝延因垂象之
薦休煩剡章之稱慶寅恭斯在嘉尚良深

賜樞密使宋庠等賀壽星出見批答

南極見象上天垂休太史獻占歸福于朕夫以壽昌之
慶豈敢專饗獨美當與俊乂大臣億兆之衆同均斯祉

永錫難老卿等欣聞吉語煩有賀章將順之誠良增嘉尚

賜感德軍三軍將吏僧道百姓等詔

朕以允初德器早成天屬為近適總司于留務俾節制于中權進領藩方留宿京邸且念賢王之子用伸敦族之懷矧茲美原抑乃名土按之析瑞壯厥維城汝等遂被撫臨諒多欣懌今特授允初依前檢校尚書右僕射持節耀州諸軍事耀州刺史兼御史大夫充感德軍節

度耀州管內觀察處置等使仍加食邑七百戶食實封三百戶散官勲封如故茲示諭想宜知悉夏熟將士等各得平安參佐官吏僧道耆壽百姓等並存問之遣書指不多及

賜山南東道三軍將吏僧道百姓等詔

朕以賈昌朝業茂公台器全文武命建牙于南紀仍主籓于北門冠于九侯時惟伯舅屬以首樞缺職前著咨才召還溫省之嚴入冠本兵之任朝言協比國論倚成

緬想吏民久承節制自聞朕命諒愜爾情

賜河陽三城三軍將吏僧道百姓等詔

朕以宋庠文儒之宗台宰惟舊近解樞衡之重俾兼袞
鉞之榮言念盟津前經坐鎮命茲書社利以建侯俾寰
輔以作藩庶京師而蒙福眷言士吏以及軍民聞孚號
之已行諒輿情之胥悅今特授宋庠依前檢校太尉同
中書門下平章事使持節孟州諸軍事行孟州刺史充
河陽三城節度孟州管內觀察處置河堤等使判鄭州

軍州事故茲示諭想宜知悉

賜建雄軍三軍將吏僧道百姓等詔

朕以許懷德少歷戎行老知軍志早持齋鉞久衛寢戎
頗積勲勞用加恩數俾侯中冀書社平陽緬想吏民同
嘉師帥今特授許懷德檢校司徒使持節晉州諸軍事
晉州刺史兼御史大夫依前充殿前都指揮使建雄軍
節度晉州管内觀察處置等使加食邑七百戶食實封
三百戶功臣散官勲封如故故茲示諭想宜知悉

賜彰武軍三軍將吏僧道百姓等詔

朕以李昭亮門濟忠猷世承勲烈羣澄氛于保塞命書社于濟陰升冠內微倚臨北道顯庸惟茂令聞逾昭進兼牢鉉之名就司留鑰之務輔藩惟舊臺鉞有光緬想吏民遙承節制嘉聞異數增慰輿情

賜淮康軍三軍將吏僧道百姓等詔

朕以張茂實早分將鉞嘗帥騎兵參圖前勞召還舊物解符書于郢上進茅瑞于淮西遙制藩宣入司宿衛緬

惟有衆嘉此建侯今特授張茂實檢校吏部尚書使持節蔡州諸軍事行蔡州刺史兼御史大夫充侍衛親軍馬軍副都指揮使淮康軍節度使蔡州管内觀察處置等使加食邑七百戶食實封三百戶功臣散官勲封如故故茲詔諭想宜知悉

賜寧國軍節度使北海王允弼摹勒御書飛白上進詔

省所上表蒙賜御書飛白二字謹摹勒上石上進事具

悉朕以聽朝之餘寶茲寸晷自惟翰墨之尚猶賢博奕之為聊因飛毫予以結字式將意眷且寵親賢卿有兩獻之風躬二南之美喜宣上德樂盡忠規忘蟬翼之匪工煩龜趺之立刻爰緘墨本乃刻奏封深陳感遇之懷且顯游揚之志本于信厚嘉乃恭謙省覽以還愧尚無已

御書賜龍圖閣直學士權知開封府蔡襄摹寫賜御書刻石事敕書

省所奏伏蒙特賜御書臣齋戒摹寫刊著于石次錄獎
詔及臣所獻古詩兼載後序以紀遭遇裝一軸上進事
具悉卿體行清方才謨詳正通于學術粹是風業朕選
諸近侍佳有名臣因暇日以援毫命中璫而賜字蓋以
將朕異睠成卿令名退思匪工追用自慙而乃深于感
遇篤在游揚形頌歎之長言溢尚

案蔡襄集有御書碑序其載勒石摹進始

未在至和元年六月二十四日其結銜稱起居舍人知
制誥與此不同者考襄本傳自起居舍人遷龍圖閣直
學士知開封府蓋其勒石作序在為起居舍人時而賜
敕則已在轉官後也襄集不載敕書此下闕文無考

賜右神武大將軍睦州團練使宗諤進太平盤維

錄敕書

敕宗諤省大宗正司奏汝纂歷代宗屬事蹟勒成上下
二帙總六卷分一十二門仍請名曰太平盤維錄上進
事汝迪德自先蒙廕于後能外紛華之習頗勤教學之
方闡繹舊聞尋研本系類成編次亶有綱條撮諸胄緒
之華光我神明之祚奏篇來上乙牘以觀有嘉規為良
深歎尚

賜宗室磁州防禦使承亮進裕享受釐頌敕書

敕承亮省大宗正司奏繳汝表今撰裕享受釐頌并序
投進事朕臯者法一閏之氣講三歲之祀孟冬吉酉裕
于祖廟陳歷代之寶奏大安之樂神靈嘉饗雲景杳冥
朱燎既升正陽顯見豈予能感抑祖宗右焉汝肅雍侍
祠將順為志中有和樂發于頌歎大宗獻狀奏篇登御
流藻以揚主依義而顯君省覽之餘歎尚兼至

賜翰林侍讀學士知徐州呂公綽進明裡詩敕書

朕臯以祗飭齋輅肅奉陽郊合祛乾祇登侑祖考秩上下之祀則靡神不宗致精微之產而惟帝時享錫朕休福惠茲羣黎夫豈寡德之能實繫先烈之茂卿職參經幄任總藩符志在游揚形于頌歎思致婉錯典裁淳深省覽不忘嘉尚兼至

賜知濟州李及之進唐雅敕書

省上表所撰唐雅十篇謹繕寫附遞上進事具悉汝職居延閣符守列城宣詔條而弗苛服文史以為樂研尋

前載追述雅風文采深純典裁詳密奏篇來上留牘于
中省覽之餘不忘嘉尚


賜交趾李日尊進異獸敕書

卿仍世守藩乃心向國越滄波而述職奉異獸以致誠
在遠彌忠顧勤可紀式將頒賚爰寵傾輸當體眷懷益
思恪順

賜宗室叔裒進異獸歌敕書

近者交州遣使以麟底貢私怪物色之異且驗載籍之

傳通儒碩生多云非是朕方懷柔彼俗重違其情與見
于庭命納諸圉汝以宗藩之秀時豫觀者喜毛羣之馴
擾美島夷之稽服昭我德政形于頌聲副以編聯乙于
省覽游揚兼在喜尚弗忘



欽定四庫全書

集部

文恭集卷二十六

詳校官侍講_臣王燕緒

檢討_臣何思鈞覆勘

總校官原任中允_臣王燕緒

校對官編修_臣于鼎

謄錄監生_臣章玉植

欽定四庫全書

文恭集卷二十五

宋 胡宿 撰

內制

賜新除參知政事曾公亮詔

國朝之制設陪貳之職以輔翼台宰名數之重下丞相
一等朕之選任必屬賢髦卿志度深沈識裁詳密以道
術侍朕講以典冊宣王命請治寰輔擢尹京師厥績茂

焉其試效已是用升厠公府參聞政道采于議者固無間然沖挹之懷遽形囊奏雖謙風可尚而命綍已行勉思大猷勿為曲讓

賜參知政事曾公亮乞退不允批答

省表具知卿志行修明風業夷遠通習治具洽練朝章間繇禁聯陪貳宰路毅然有守知無不為夙夜嬰煩晦明虧裕暫從謁告適此養恬即當善平入奉參決忽得章請來謝政塗頗用憊然寧當議此況廟堂之上具有

規隨而機務之間未至停壅勉輔藥石宜安精神勤味粹和速期康復

賜參知政事曾公亮乞退第二表不允批答

卿性度淑均才謨隱濟預聞大政陪貳上公夙夜宣勞晦明嬰恙暫從頤衛日冀善平何遽貢章乃求謝職且周官垂法有寬疾之文漢家養恩著賜告之令卿其少思省慮味恬餐和勿有疑焉急就良已

賜參知政事曾公亮乞退第三表不允批答

卿以耆明之姿參駸駸之政謀謨匪懈陟恪良勞偶爽
節宣暫從頤衛茲有生之未免亦憂職之使然賜告所
存養恩斯在比觀章請求謝宰聯批諭已勤控陳未已
況朝無闕政而世方須才勉圖粹和速就康復

賜參知政事曾公亮乞退第四表不允批答

卿精誠雅行至範明猷佐時矢謨貳公圖政偶嬰甚美
之疾適聞良已之音比及暄辰固加常膳日期朝謁跂
聞話言前已批章復有今奏懇求解罷殊異眷毗卿其

研味真腴屏息煩慮期于勿藥慰茲側席

賜參知政事曾公亮生日禮物口宣

陪貳宰司贊襄治道惟陽中應律之朔乃間左設弧之辰政在尚賢禮存嘉惠侑茲燕喜體我寵恩

賜鎮安軍節度使行尚書右僕射檢校太師兼侍中判許州賈昌朝生日禮物詔

時惟舊德位冠元侯京室是陪藩符攸總誕期斯至慶賜用覃俾爰子舍之良得致家庭之命侑茲宴禮示乃

朝恩

又

喬岳吐符巖廊誕器周旋二府陟降三階季商協辰左
弧在旦馭貴有典加惠著文爰錫餼牽以及醪酒式將
恩意往侑宴私當體壽儀即祇慶賜

又

陶元精之和躬咸德之美蔚為俊老殿我輔邦六射記
辰九秋肅氣加惠隆于國典為壽盛于家情俾爰似續

之良式將賚予之意用資族宴姑示朝恩

賜山南東道節度使同中書門下平章事賈昌朝

敕書

朕獲天人之助乘畿夏之驪祓除路朝崇講祠事以順
衆志以答靈休日吉辰良氣調時豫熙典云究慶賜是
孚卿王室元耆人倫先覺早冠居于鉉席首敷變于化
陶三讓彌沖一德逾劭居保釐尹正之重有安輯勞徠
之功朕饗告成乃眷斯在進胙以爵加惠于田雖曰舊

章抑以疇德已頒告于庶位復往宣于朕懷當體休成
同均慶賚

賜山南東道節度使檢校太師同中書門下平章
事賈昌朝口宣

卿德冠時宗地居寰輔羣羣誕辰之節泛推任子之恩
乃選上駟來充內廐羨名駒之奮發煩駿足之效牽載
省寅恭良增嘉尚

賜賈昌朝口宣

朕虔諏景至恭事天明禋典迄成祥釐均被卿朝家俊
又藩岳儀刑體貌所先寵光宜厚褒元功而進號益多
賦以衍田馳遣使軺奉將命綽用敷休渥當體眷毗

賜賈昌朝赴闕茶藥口宣

卿留籓再司介圭入覲爰屬秋暘之候用勤參御之行
耆哲是勞眷毗增厚式頒藥劑庸示寵私

賜觀文殿大學士判亳州陳執中乞致仕不允批
答

省所上表陳乞致仕事具悉卿俊乂大臣者明碩老再
冠朝首比讓台元輔泰象財成之宜得大雅進止之度
往治于亳實陪厥京偃藩在茲蒙福多矣如聞攝衛稍
虧和平已出見于屬官諒再加于常膳舊德所至卧理
有餘何乃上言欲求謝事是未亮憑賴之意而規適宴
之私卿專精神近醫藥納養善氣保固太和避第仕塗
未可議也

賜觀文殿大學士判亳州陳執中再乞致仕不允

批答

卿器采精明體韻方重奕世濟德先朝納忠逮充舊貫
之居再處阿衡之首將明典度勵翼官師朝有公言朋
無私謁比辭政柄屢避台階靜勝杞于澆風偃休寄于
密甸均勞近止蒙福在焉微有苦于足腓遽見求于身
退茲豈藩鎮優耆德之意朝廷待元老之心耶卿其養
精神省思慮淮陽卧理西河偃藩是所望于大雅也

賜鎮海軍節度使判亳州陳執中待罪特放敕書

夫道隱不還民散已久刑之設惟五而惡之討有十敗俗之自從古則然卿舊老壯猷俊德哲望近辭時柄甫偃价藩宣風有初頒教尚淺民之從違政何加損遽形引責殊異眷毗且諒寅恭彌嘉慎畏

賜昭德軍節度使知并州龐籍口宣

省所進奉賀正馬貳匹事具悉朕因三朝之吉受四海之圖方貢畢陳朝慶大集卿時惟俊老殿我強藩寅修述職之文遠效克庭之禮載馳上駟來貢承華有諒勤

恭良增嘉尚

又

省所進奉謝恩賜牌印并公使及到任馬共六匹事具
悉卿文武兼劭風德竝優業載賢公望居俊老朕以壺
闕襟帶并土股肱崇以高牙殿于大鹵甫頒條詔初見
吏民宴搞有儀公帑惟舊至煩稱謝乃有效牽滋顯勤
恭弗忘嘉尚

賜新授觀文殿學士知鄆州龐籍口宣

卿國之耆俊材號將明二府迭更一德咸有鼎辭時柄
倚臨東藩得茲老成居然治靜圖中階之宿望進書殿
之偉名異數有加師言允穆乃馳上駟來實內閑有嘉
傾輸良增歎矚

賜工部尚書同中書門下平章事集賢殿大學士
韓琦生日禮物詔

惟天所賚若時相予甫屬開秋實惟誕日稽諸朝範寵
于邦家于是有牢醴蕃庶之錫所以侑族宴而將壽嘏

也斯禮則舊厥命惟新祇若其承體茲乃眷

又

蔚以傑才相予大政首秋云吉誕日在茲俾按彝文式
將渥賜庸示宰朝之寵且為族宴之榮往惟欽承體茲
眷矚

又

體茲間氣誕是傑才素律云秋左弧在旦餽牽加惠醪
醴侑懽佐族宴以在茲稽臺恩而惟舊

賜武康軍節度使韓琦口宣

卿識業夷通謀謨高正早參內密之近比更方面之煩
器望益隆誠績兼茂擢升書殿之重就增儀職之華殿
乃戎翰崇茲朝範爰效上駟之貢式充內殿之羣載閱
勤恭良深歎尚

又

朕親郊修報升燎告成覃惠臣工均釐藩岳卿居傑望
濟以忠圖方倚幹垣用優名數進崇階而馭貴疏多邑

以昭庸馳命輶車往頒命綍惟茲茂渥宜卽欽祇

又

卿風致高劭識寓宏通宣翼藩朝明暢文武外易戎翰
之重就升師鉞之雄乃睠在茲僉言允若爰貢上駟來
寘內閑益亮誠勤彌欽意尚

賜新除觀文殿學士知河陽富弼對衣金帶鞶轡
馬口宣

卿忠惟許國任屬陪京書殿升聯地官進貳式將眷倚

往致匪頒

賜除富弼起復禮部尚書同中書門下平章事昭
文館大學士赴闕敕書

卿大名宰國宏業熙朝遠略有開高謨未究遭艱去位
銜恤在家上鉉曠才冢卿缺職永惟在疚亦已累旬涼
瑣虛懷蒼黔待起朝有舊制國念前徽須伸權奪之文
庸副仰成之意庭有孚號物無異言義固掩恩忠本移
孝勉思美業就成茂功尚抑餘哀來慰勤佇

賜宰臣富弼生日禮物口宣

象炳中階業隆上鉉維申誕日行夏紀時俾孚子舍之
良奉若家庭之賜式增榮觀當體寵恩

又

挺生時傑光輔本朝眷乃首春慶惟誕日爰舉優賢之
典用頒加惠之恩侑族宴以是宜寵台司而斯在

又

元傑稟氣英瑋誕才若時奮庸代工變化三元首序六

射在辰國有賚恩家榮宴喜餽牽將禮醪酒侑懽舉是
寵章體茲渥眷

又

吐符喬岳居守阿衡建杓于寅設弧在旦眷言彝典尊
禮冢司有醪酒之頒兼餽牽之錫助家庭之為壽廣嫺
族之合懽慶賜是將祇受惟允

賜忠武軍節度使知永興軍文彥博口宣

邇以九里之祀陟配天丘三朝之元會同王歲宗公先

郊類之澤羣岳有朝慶之文卿業著蕭規地崇陝弼舉
裡祀而為勞頒賞策而則當爰及首正茲惟獻節竝效
名駒之貢莫非上駟之良有美款誠尤多歎矚

賜河陽三城節度使檢校太師同中書門下平章
事文彥博生日進馬口宣

卿辰象粹精台衡俊舊彛緣誕日申舉賚恩命仲氏以
奉將助家庭之式宴仰惟彛範煩有奏函爰馳上駟之
良來實內閑之祕恭勤斯至嘉尚弗忘

賜保平軍節度使檢校太師同中書門下平章事
判大名府文彥博生日禮物詔

公台舊德俊哲大臣適居主籥之司爰屬設弧之旦俾
將慶賜命遣使人當體寵加所宜祇受

賜新授龍圖閣學士張昇口宣

卿體行直清才局明劭政為邊最譽決朝端升委強藩
就遷禁職爰貢簫雲之駿來舒就日之誠有美勤斯良
用嘉尚

賜參知政事張昇上表乞致仕不允批答

夫年之貴于天下德之先于人倫尚矣況乞言憲老存
諸典刑圖政任人寄在耆哲至于進退豈局于彛制哉
卿老成司直清忠篤行閱古今之義理歷內外之事任
蔚有風采稔聞謀猷憑賴忠規參毗政道雖年塗云及
而志力尚全何遽揆章乃欲謝事是未亮眷倚之意而
自取宴安之適使朕何望焉

賜參知政事張昇上第二表乞致仕不允批答

夫治朝柄任豈局以年良臣忠規不遺其力卿蔚為俊
老翼于沖人黃髮無愆清德有素雖年塗云及而志力
不衰陟恪肆勤精明暢理方陪大政適倚老謀比閱奏
于公車願還事于宰旅已嘗批諭猶此控陳是未炤委
成之懷而自圖安佚之利雖佳知止難從恬退

賜參知政事梁適生日禮物口宣

體資上節地亞中階自參翊以宣謨號通明而任職屬
開秋之統序協誕日之吐符朝有彛恩禮優近弼爰舉

匪頒之式用將眷倚之懷俾洽宴私且昭榮遇

賜定國軍節度使知太原府梁適口宣

省所進奉端午馬二匹事卿利建高牙倚臨雄閫爰邁
浴蘭之節來效簫雲之良姑美勤恭尤增嘉尚

賜彰信軍節度使判成德軍李昭亮敕書

地濱北落月旅西成沖氣薦和下滋于寶稼靈苗合穗
交蔭于綺塍昭萬寶之順成示三登之長楸卿兼榮麾
鉞長治戎翰覩擢穎于遐疆喜同符于異畝伾圖來上

列牘以聞將順在茲欽歎曷已

賜彰信軍節度使新授同中書門下平章事判大名府李昭亮赴闕茶藥口宣

卿召言侯藩入覲王所歷嚴途之阻越諒旅從之勤疲爰舉匪頒以將眷勞

又

卿外自國藩入修王覲歷悠長之官道冒嚴厲之時寒言念勤斯固應勞止爰伸迎賚用示眷恩

賜新除昭德軍節度使同中書門下平章事充景
靈宮使李昭亮赴闕敕書

卿參中階之象帥北落之師煩我老成亦已久次方升
庸于旌鎮命總職于琳庭亟奉介圭促祇召節

賜馬軍副都指揮使淮康軍節度使張茂實赴闕
茶藥口宣

卿遠從旌鎮入衛巖除廣莫風高嘉平臘近特頒良劑
用示寵恩

又

卿召言歸國緬想遵途屬此凝寒勞于厯薄式將奩賜
庸示臺恩

賜相州觀察使知邢州劉從廣赴闕茶藥口宣

敕從廣合符去郡效駕還臺冒闕暑以甚勤歷修程而
良苦式頒珍劑用洽寵私

又

卿載馳蒲節近次都畿佇延矚之有初諒興居之無爽

用頒餽禮式洽恩私

又

卿言趨觀闕適次郊衢睽受玉之有初諒據鞍之匪易
用頒良劑式示寵私

賜侍衛親軍步軍副都指揮使涇州觀察使定州
路駐泊副都署王凱赴闕茶藥口宣

卿總治師于輯寧邊部特降璽書之召用頒藥劑之良
茲表眷存所宜祇奉

又

卿肅奉更書還司衛職初無辦嚴之日

案後漢書吳漢傳每當出師朝

受詔夕即引道初無辦嚴之日注云嚴即裝也避明良帝諱故改之此制詞引用全句原本辦訛辦今校正

深跋履之勞飲劑所頒恩禮斯在

文恭集卷二十五

欽定四庫全書

文恭集卷二十六

宋 胡宿 撰

內制

賜福建路轉運使秦玠平江西賊敕書

鼎者盜興江西勢接閩嶺延入爾部驚騷吾民汝善布
教條能設方略協比州將帥厲兵官開募勇夫翦戮姦
黨兇渠遂殄生聚以安使指告還章封言狀眷茲勤略

良可嘉焉

賜提點刑獄施元長平江西賊敕書

汝早稱才名外提憲寄日者他盜侵于本部勢頗屯結
衆甚繹騷而能躬履險難星言馳赴奮厲衆力開幕短
兵翦戮兇渠離散支黨屬城以肅外臺上言協奏勤庸
甫知明略有懷謙默益用歎嘉

賜知汀州藍丞平江西賊敕書

日者逋寇弄兵江西小驚朕師逸入比境汝捍固本土

協議外臺開幕短兵帥厲衆力休有方略訖致殄平爾
勞居多使者言狀有懷忠力良切嘉焉

賜京東路轉運使董沔殺散河北賊敕書

敕董沔省龐籍奏河北過來軍賊兇勢不小齊州兵甲
殺敗後若不急行翦除或散入鄉村即復為民患汝尋
披帶兵士徑往兗齊二州往來催督諸頭下兵甲接續
殺獲事汝強濟有聞廉清自勉夙將漕節受任外臺而
齊魯之疆濱接朔土潢池斯在姦盜是依屯結其中寇

攘為患槌發陰伏伺知起居親糾合于環兵廣設施于
明略翦除支黨清定部封吏息追胥之煩民去驚騷之
患慈惠孔碩厥庸為多東藩帥臣剡章言狀有嘉勤蓋
良深歎矚

賜判大理寺郭申錫及審刑詳議官等敕書

敕郭申錫等省權知審刑院事張揆奏據大理寺日奏
司申十月十六日以前送下公案茲已斷奏了畢無見
在事外郡請誠繫囚待報況茲寒苦朕甚閔焉汝等法

術通深才資開敏平亭疑奏附致比例咸適例成之慎
而無几案之留有副欽矜良增嘉尚故茲獎諭想宜知
悉

又

羣氓多辟庶獄滋豐用存疑讞之科以廣平反之施爰
書來上累牘實繁汝等持法甚平以文無害究研惟允
操決靡留遂停丹筆之書盡釋黃沙之繫適當歆毒良
副哀矜爰覽奏陳尤多嘉尚

又

國家刑典用中獄疑許讞決平寄于列寺審克存于禁局相為表裏參適重輕用慎例成庶無壅濫汝悉心處當持議詳明論報弗留開敏可尚閱茲奏述深于歎嘉
賜權判大理寺陳太素等敕書

朕日見羣臣親覽庶政惟諫官論事法官奏讞雖復肝是猶為之論決所以者何防壅蔽而慮留獄也汝等竝以一時之選典茲三尺之法能以明慎敏于弊斷鞠書

隨傳列牘告殫益彰宿業之勤良副欽刑之寄永言嘉
尚弗忘于懷

賜權大理少卿王惟熙等敕書

昔林光斷獄歲止三四貞觀大辟裁二十九嗚呼何施
而臻此乎朕道化未孚刑禁且衆鞠書比上請讞亦繁
汝善體哀矜敏于弊斷不使留獄頗副欽刑言念恪勤
弗忘嘉歎

又

夫刑罰之于化民未矣然至治之世不能去刑朕燭理未明躬化猶爽鞠書狎至治讞尚繁汝等善體哀矜良勤弊斷丹筆無滯几案為空爰覽削陳弗忘嘉歎

賜皇兄寧國軍節度使同中書門下平章事同知
大宗正事北海郡王允弼敕書

卿任隆藩翰地處親賢參耀台文董司宗牒克諧公族允穆朝言近以宗說等瀆干人倫陷此邦憲迹惟可醜理莫得容卿首秉宗司乃同官守骨肉薄罪可養于私

恩名教大防難隱于公議深惟舉白良合糾虔屢上奏
封具昭謙畏誠防閑之不逮匪訓導之有愆當體眷懷
勿煩敷述

賜平江軍節度使兼侍中知大宗正事允讓敕書
卿藩國表儀宗室賢亮體行明潔器範端修資六德之
夙成賴九宗之治正本支以睦譽望孔昭近以公族之
中愆于至行弗率乃教自陷匪彝猶以家情屈于邦憲
茲固愚鄙之稟所謂不移殆非訓導之方有所未至何

用防嫌而上奏章求解太宗之司殊乖尚德之寄當念
燕詒之重姑懷慎敘之仁懋勉居諸益勵來者

賜起復雲麾將軍濟州防禦使王仁敕書

卿制邊部之雄控大鹵之重比因朝慶且拜臺恩遠傾
就日之誠來效簫雲之駿有彰勤叩良用歎嘉

賜新授憲州防禦使劉渙敕書

汝以沈敏之才得拊循之術擢升軍禦董治戎昭亦緣
端治之辰併有效牽之貢載懷勤叩良用歎嘉

賜撫州刺史滄州鈐轄董貴敕書

汝遙剖左符出鈐尺籍遘茲景至欽乃燎熏能竭寅恭
交修貢助彌昭誠恪良用歎嘉

賜侍衛親軍步軍都虞候王從政敕書

汝參司親衛出護邊兵邁乃升陽會茲報貺修其貢助
奉此效牽有加勤恭良深歎矚

又

汝世濟勲勞材推果壯領巖除之禁衛升候奄之榮名

尚委強藩實繫忠力爰輸上駟來實外閑載諭款勤良
增嘉尚

賜鳳州團練使高順等敕書

汝出總戎翰內參親衛力于經武志在輸忠爰因端節
之良乃選上駟之駿效牽闕下底貢閑中載閱勤劬尤
增嘉尚

賜知建昌軍曹觀敕書

汝職在劭農土惟宜穀修列郡經常之貢省大官蕪擇

之勞言念效勤良增嘉尚

賜原州刺史知涇州安俊敕書

三朝受籍萬玉在庭汝擁衛邊隅拱懷朝次效名駒于
龍友實華殿于橐泉眷茲虔恭弗忘嘉尚

賜海州團練使史吉敕書

汝肅綰戎團分持軍簿並緣任子來貢維駒慶賞所延
勤誠可尚

賜潭州通判李丕緒等修子城敕書

敕李丕緒省知潭州任顓奏汝都大提舉管勾修築子
城用軌甃砌並得完備事汝受任湘中服勞官下志存
經遠慮及居安能協守官率和旅力增完城壁就濬池
隍悅使有宜樂成無射條聞來上嘉歎良多

賜新除資政殿大學士吳育對衣金帶鞶馬口
宣

卿籍起洛臺詔藩陝服偉名增職左右陪卿庸示眷毗
就頒錫與

賜觀文殿學士田況乞致仕不允批答

卿素秉忠規早司樞筦經營百物通知四夷鼎以愆和
久茲移疾交章求解批諭弗從尋亮至誠姑授閒職庶
熙神于事外得味道于環中就乃平康副茲眷矚何乃
遂求挂冕荐貢奏函卿雖身災所嬰而年塗未艾宜息
煩慮更謁善醫及此暄辰早復常膳

賜參知政事王堯臣生日禮物口宣

才具之美高映時髦識業之明坐陪國論屬此仲商之

序協于誕日之良舉是朝恩助茲族宴抑乃匪頒之式
體子眷賚之私

賜新授右諫議大夫皇甫泌口宣

卿稔服吏文兼資識致擢升諫列移領藩條爰擇上駟
之良來奉內閑之貢有懷勤叩茲用欽嘉

賜兵部員外郎知制誥吳奎知壽州口宣

省所進奉新茶芽事具悉淮土上腴園茗繁植春英所
掇時品為良方貢是勤嘉尚無已

賜鎮潼軍節度觀察留後知郾州李端懿口宣

省所進奉阿膠事藥劑所須膠品斯在區產云記阿井
曰佳卿守在藩條述茲方貢謹于熬治協乃精良足諒
寅恭誠增嘉尚

賜新授禮部郎中充天章閣待制陳賜叔口宣

卿體業冲劭器宇夷通有意本朝允宜內閣乃眷北道
姑委要藩爰貢良蹄用嘉美志

賜鎮安軍節度使判陳州程林口宣

鼎以拜貺于郊覃渥在位而我王室之老實殿輔邦之
雄賞策所班朝範惟舊俾爰子舍往錫命書卿出于忠
純篤為誠節選上駟之駉耳實中殿之承華載閱勤恭
彌深歎尚

賜鎮東軍節度觀察留後知潁州李端愿口宣

省所進奉端午馬一匹具悉卿總司留印長治帥藩爰
因采艾之辰乃效傾葵之志獻之上駟奉厥內閑有嘉
勤恭弗忘歎矚

賜新授閤門使康德輿口宣

汝歷護塞兵見稱武幹適重別都之委用優上閤之遷
當勵忠規以虔恩數

賜河陽三城節度使檢校太師同中書門下平章
事王德用口宣

卿地美忠門位聯宰路間于兩社夙兆于祥占乘彼八
鸞適敷于惠化爰因誕日用示錫恩俾爰似續之良奉
乃匪頒之品抑惟彝禮遽閱秦函選屈產之名駒實承

華之內殿載惟款至良切欽嘉

賜五臺山十寺僧正順綰等敕書

省所進新正功德疏事具悉吉祥剎土名勝伽藍淨衆
所棲元正斯屆大營蒲塞之饌廣演貝多之文用集妙
因來陳壽祝勤恭彌顯嘉尚良多益在薰修副茲嚴奉
賜五臺山十寺僧知今等敕書

省所進新正功德疏到闕事具悉汝等宴坐名山安棲
淨衆鼎遭三朝之吉來祈千福之祥用嘉乃勤且命以

賜茲乃前矩厥惟彝恩咨示薰修體予崇奉今賜知今等紫僧衣一對絹二十疋故茲獎諭想宜知悉

又

汝等薰修巖谷宴坐道場因王歲之紀端奉梵文而歸福有嘉精志用錫顯恩宜服圓乘益勤勝業

賜回西蕃獎州團練使霞展敕書

汝欽奉聲文恪修誠志遠效踰沙之貢載從易地之遷庸示茂恩益圖忠款

賜西蕃獎州團練使霞展男都君主霞智敕書

汝族高邊部志拱諸華載馳上駟之良來奉內閑之貢
有嘉款到特示頒宣

賜交趾李日尊敕書

卿忠存奕世義戴本朝善繼藩稱能靖封守朕博臨庶
國普愛羣氓爰覽啟陳用嘉恭順

賜占城國王敕書

卿志慮深純誠節款到邈居溟漲之外馳系闕庭之間

嗣守忠規述修世職遣茲使介奉乃表章越沃日之驚
波致旅庭之貢物傾輸斯至勤叩可嘉用示眷懷特蕃
錫與益思祇順當體寵優

賜占城國王俱舍利波微收羅婆麻提楊卜敕書
省所差人進奉生象二頭象牙二百二株藥犀大小一
百九十一株下色紫礦一百九十一斤中色煎香五百
斤下色煎香五百斤事具悉卿長治國藩聿修王職地
雖居于遐外世彌篤于恪忠匪忘存闕之誠來效占風

之貢俾爰使指載越溟津亟覽表章深嘉誠節式將乃眷之意特推加惠之恩當體寵優益思欽順今回賜卿銀三千兩錢一百貫文至可領也其差來蒲息陲琶等到闕各支賜對見朝辭衣物銀器衣著等令于殿前都使衙安下及差鴻臚少卿劉舜臣等館伴令御廚翰林儀鸞司往彼祇應酒食鋪陳其所乞白馬已支賜二匹訖故茲示諭想宜知悉秋涼卿比平安好否遣書指不多及

賜夏國主進奉賀正馬駝口宣

王歲肇新人正伊始眷乃世藩之舊主茲邦土之封爰
效忠規聿修貢式緬懷款至良用歎嘉

賜夏國主生日禮物口宣

紹復前徽述修貢職素秋建始良日誕彌用示眷恩式
將慶賜無忘朝寵益濟世忠

又

奕世資忠承邦濟美三朝開序六射協辰爰藻壽祺式

將惠賜益思恭德庸對寵章

賜回夏國主口宣

省所奏母薨訃告事具悉不圖閔凶奄失慈怙忽聞來訃用怛于懷棄背以還哀摧難處惟當抑割無致殞傷撫念所深喻言何既

贈太師中書令貽永祭文

卿體行淑均志慮忠篤久毗內密蔚為老成甫解繁機俾究遐福奄忽不憊傷悼于懷適及攢塗裁致薄酌餘

哀所寄明識當知

贈太尉兼中書令濮王祭文


惟靈地居宗戚德乃令王邁于綿疴奄然長逝茲用恫悼不忘于懷卹典申加攢塗暫闕爰修奠酌其鑒追哀

又

早繇近戚參賴敏材領帥藩房留治都局年塗雖晚志力尚強奄及云殂初不聞疾永言茲悼有歎常懷馳遣信臣裁致薄酎緬想營識儻能歆斯

又

籍在外屬帥茲列藩歷侍近嚴比更煩委適奉朝請奄
至喪亡先遠有期永懷無已俾爰伸耐冥識追哀



文恭集卷二十六

欽定四庫全書

集部

文恭集卷二十七

詳校官侍講

臣王燕緒

檢討

臣

何思鈞覆勘

總校官原任中允

臣王燕緒

校對官編修

臣于鼎

膠錄監生

臣章玉植

欽定四庫全書

文恭集卷二十七

宋 胡宿 撰

內制

皇帝賀大遼太后生辰書

義重睦鄰禮敦誕日企徽慈之凝範因慶育之履祥爰
命使軺式將信幣祝茲壽嘏表乃誠忱

賜契丹人使茶藥口宣

卿信函修睦誕節講懽載勤使隰之行諒有夕冰之慎
用頒湯飲式示眷懷

又

卿對持瑞節參奉信函來慶誕辰載涉長道用頒飲劑
式表眷恩

又

卿等對持節旄遐涉疆亭紹修誕日之懽夙戒暄辰之
御有少賜物用表至懷

又

卿等奉將信節馳慶誕辰固多跋履之勞用頒齊和之
品副之良茗咸表眷恩

又

卿睦鄰將命誕節修懽惟原隰之驅馳有風塵之匱薄
俾爰往賚用示眷恩

又

卿式將赴告載越阻脩固多跋履之勞宜厚撫存之眷

用頒良劑以示至懷

又

卿等對銜使指交慶歲元久冒寒凝良勞跋履式將賜
物庸表至懷

又

卿奉將使指載整華輶惟區薄于風寒諒勤疲于原隰
就伸頒賚庸助綏將

又

卿參陪上介並駕輶車深惟跋履之勞固積疲勤之思
往伸勞賜用表眷存

又

卿首銜使指交慶王正惟匱薄于盛寒諒勤疲于脩陸
致茲賚物昭乃眷恩

又

卿信節副行端辰入慶登岐云邈攬轡良勞宜有匪頒
以昭眷矚

又

卿蔚居使首祗慶歲元屬風霜之凜如諒原隰之勤止
式將予賚俾澤爾勞

又

卿陪貳使華講修鄰好慶三元之嗣歲歷百舍之在塗
宜有賚焉且嘉勤止

又

卿等竝持國節紹講鄰懽勤勞累驛之程匱薄餘寒之

氣式將賜物用示眷懷

又

卿對銜使命紹講鄰懽率旅從以來斯冒脩塗而勤止
往伸賚物用表眷恩

又

卿等蔚為使首遙奉國函來修誕節之懽良若長塗之
涉特伸頒賚庸表眷懷

又

卿陪貳使聯講修鄰聘爰得謁關之告用嘉馳隰之勤
往致匪頒式昭眷勞

又

卿蔚為使首聘茲歲端載迂晨霧之行諒有夕冰之慎
用頒良劑以表至懷

又

卿因三元之首講二國之懽率旅從之甚勤冒祁寒而
良苦俾爰賜物以示眷懷

又

卿以二國之好充備于使華三朝之元踐修于儀聘載
勤馳隰仍冒凜冬良劑所頒沖眷斯在

又

卿協恭使指爰率于烝徒奉聘歲元式將于信幣寒凝
甚苦匱薄良勞茲用寵頒以昭深眷

恩州賜北使茶藥口宣

卿等來慶誕辰適當維夏駕乘駒而云邈馳使隰以良

勞特示寵頒用伸至眷

又

卿等對將聘節胥洎烝徒來修誕日之歡載涉迺疆之
迴特伸頒勞用示寵嘉

白溝驛撫問北使口宣

卿等張是使旌講于懽聘來慶誕彌之吉諒多匱薄之
勤用示眷慈特頒宴賚

白溝驛撫問北使兼賜御筵口宣

卿等嗣修鄰好甫次溝封載勤使隰之行宜有詔筵之
錫用嘉冒涉特示眷存

又

卿等銜奉信辭講修誕好惟載馳于使乘諒甫次于疆
亭用示眷慈聿伸宴勞

白溝驛撫問遺留人使兼賜御筵口宣

卿等式將遺意爰奉訊函次境舍以方初駕輶車而良
苦宜伸宴勞庸示眷懷

雄州撫問遺留人使口宣

卿等奉將末命來致遺儀馳原隰以良勞次溝封而云始用伸撫諭宜體眷存

雄州撫問北使口宣

卿等言冒脩程來尋舊好且以嗣君之慶續茲與國之懽緬念勤疲用伸撫諭

又

卿等對銜君命聯飾使轡惟境上之甫臨計道中之良

苦俾爰勞問示乃眷私

又

卿等交慶歲元甫臨境首顧寒凝之方盛在跋履之良
勞用撫乃誠式將予眷

又

卿等交修鄰好胥慶歲元適冒寒塗良煩旅從有嘉勤
篤特示眷存

又

卿等被選使華務修邦聘涉溝封而伊始戒徒御而甚勤特示撫綏用伸眷矚

北京賜北使御筵口宣

卿等肅將君命祇講鄰懽顧旅從之寔繁屬祁寒之斯盛用伸宴賜式示眷綏

又

卿等踐修篤好馳冒遐塗爰偕旅從之行適次別都之近用嘉勞止是錫燕胥

又

卿等慶茲誕節奉乃聘儀來修與國之懽適次別京之
近爰伸燕勞用表眷懷

又

卿等載馳使隰爰講鄰懽眷馥邁以勤斯諒脩程之勞
止就伸詔撫庸示宴慈

班荆館賜北使赴闕御筵口宣

卿等肅將君命俯次都門跋履良勞敏勤可尚特頒宴

惠用示眷懷

又

卿等銜命新君駕言遠道來奉纂承之告諒多跋履之艱適次近亭用伸勞宴

班荆館賜北使到闕酒果口宣

卿等睦隣持聘嗣歲講懽車馭以良勞次國門而伊
通用頒勞賜式示寵恩

又

卿等紹修鄰好交慶歲元如聞使乘之馳已次都門之
近式將予賜庸勞乃勤

又

卿等奉聘講懽祝延修慶載馳使隰近次都門爰命寵
頒式昭渥眷

又

卿等載脂使乘言屆都門講懽聘以惟勤申宴慈而既
渥用嘉行邁式示眷優

又

卿等踐修時好聯慶歲元俯次近郵良勤長隰縹緲甘
實用示寵恩

又

卿等預選使華交修懽聘惟嚴塗之載涉諒旅從之甚
勤用均御府之甘以勞輶車之恪式昭眷寵宜在祇欽

又

卿等奉將遺指言次近鄰爰屬炎辰載勤遐路宜伸勞

賜以表眷恩

就驛賜北使內酒果口宣

卿等久馳使隰甫憩都郵惟按轡之良勞且解裝之方
適用頒甘品式示寵懷

又

卿等使旌來聘里館載寧用頒膚寸之醪兼錫上腴之
果侑茲宴勞體乃眷恩

又

卿等講修誕慶協比使華冒暄溽以良勤宣偃休之為
適特伸頒賚用示眷嘉

又

卿等使指遙銜歲元交慶爰錫甘腴之品仍頒醇旨之
醪以侑樂胥當欽眷寵

就驛賜北使生餽口宣

卿等將命乘軺告言纂服涉疆亭而惟邈授里館以云
初勞至有儀所頒非腴

又

卿等對銜君命胥慶王正爰當定館之初用舉饋牢之
舊頒茲餼禮表乃眷恩

就驛賜北使銀沙鑼唾盂等口宣

卿等奉若信函慶茲獻節解裝伊始授館有初爰命頒
宣以昭眷待

又

卿等震誕修懽遠華將命言念乘軺之久屬當授館之

初特示寵優用伸頒錫

又

卿等使乘聯華慶函講好求祝延于誕節方休舍于都郵爰命寵頒式將渥眷

又

卿等來慶誕辰載馳長道在勤勞而可尚屬休舍之初用示恩頒以昭眷寵

就驛賜北使春幡勝春盤等口宣

卿等慶屬歲元紹修邦好嘉逢春節之立喜見年芳之
新用示眷恩式昭禮意

玉津園賜北使弓箭御筵口宣

卿等來修邦好方舍都郵聊折俎以致懽命司弓而延
射用伸宴勞式表眷恩

正月一日北使入賀畢歸驛賜御筵口宣

卿等受言君所講好王正方從里館之寧且示詔筵之
賜用伸勞飲式表需恩

又

卿等奉將使節來慶王春展聘幣以成儀頒詔筵而示
惠用昭乃眷于以勞勤

又

卿等來慶歲元奉修邦好爰即安于都舍乃就錫于詔
筵用洽懽愉當知眷寵

正月一日北使入賀畢就驛賜花酒果口宣

卿等銜指嗣君繼好先日來赴惟新之慶爰屬履端之

元申命寵頒式將渥眊

又

卿等通懽二國修慶三朝爰因休舍之辰載錫甘醇之品用嘉惠好當體寵恩

又

卿等使車將命王歲通懽授館有初解裝少憩宜伸惠賜以表眷懷

又

卿等式將好幣已達訊函方退息于都郵宜就頒于良醢副之甘實體我眷恩

正月二日北使就驛賜宴花酒果口宣

卿等持聘已成履元伊始久驅馳于華隰適休舍于都郵芳翠甘醇式將眷賜

契丹賀乾元節入使朝辭訖就驛賜酒果口宣

卿等夙持鄰聘申慶誕辰嘉成禮之有儀在眷懷而增厚宜頒優賚式示寵章

賜北使朝辭訖歸驛御筵口宣

卿等慶屬歲元寅修隣聘訖奉報書之禮還脂使乘之
行用錫宴慈式將眷寵

又

卿等奉聘訖儀駕言復命將載脂于歸轍爰用錫于詔
筵渥眷是將言還斯在

又

卿等王歲修懽使華成禮已入辭于宸陛命就宴于都

郵用示眷慈式敷契好

又

卿等奉聘成儀駕言復命率丞徒而駿邁詔祖軼以寵行且有頒宣以伸眷待

又

卿等與國修懽誕辰畢禮將復乘輅之命用頒折俎之恩俾洽宴胥式將眷矚

又

卿等竝緣誕節來講至懽會訖邦儀言旋使乘用頒宴
勞式厚眷懷

班荆館賜卻迴北使御筵口宣

卿等展成信幣還駕使車用勤祖輶之行特舉詔筵之
餞以將惠好當體寵私

又

卿等擁節交懽稱觴究禮屬言旋于使乘用伸餞于詔
筵且寵成勤式昭異眷

又

卿等持聘訖儀駕言復命飭使裝而告邁伸祖輶以寵行用嘉爾勞式予眷賚

又

卿等將命講懽駕言迴馭爰即近郊之館命修載輶之儀式啓燕胥以伸眷勞

又

卿等訖奉函題還脂輶乘出次長亭之近眷言旅從之

行就錫甘醇用昭寵渥

又

卿等展幣成儀還轅復命近郵云餞轅輶且行宜示頒
恩以將渥眷

北京賜卻迴北使御筵口宣

卿等肅將時幣交慶春元飭歸馭以載馳次別都而伊
始用伸宴勞當體眷恩

又

卿等爰斂聘圭載脂歸轍眷別都之云屆在旅從之良勤特示勞還用伸詔餞

又

卿等誕節講儀使華成命言脂車轄載涉川疆用錫詔筵以勤還馭

又

卿等震誕修懽旅歸致命竝馳使牡戾止別京特示宴胥用伸眷寵

雄州賜卻迴北使御筵口宣

卿等展成聘幣促駕歸轅載惟原壯之馳俯屬疆亭之次特伸詔餞以洽寵恩

賜北使迴至瀛州御筵口宣

卿等修好成儀駕言復命適屬歆炎之候諒多履跋之勞爰錫宴慈用伸眷渥

又

卿等惟新稱嗣來赴于纘承載轄歸期聿勤于駿邁往

頒慈宴用示需恩

又

卿等將命睦鄰紹敦于舊好駕言歸國載涉于脩岐爰
錫宴胥用伸眷勞

瀛州賜卻迴遺留人使御筵口宣

卿等被遣舊君奉修遺好冒至寒而歸國率旅從以在
塗申厚燕胥庸昭眷矚

白溝驛賜卻迴北使御筵并撫問口宣

卿等為壽誕辰戒言歸國歷疆亭而載邈率旅從以良
勞特示宴慈用昭寵餞

文恭集卷二十七